

續古文辭類纂

冊古

續古文辭類纂卷二十五

下編之七

雜記類

湯潛庵石塢山房圖記

湯斌。字孔伯。號潛庵。河南睢州人。順治壬辰進士。初任江寧。

西嶺北遺告歸康熙己未舉博學鴻辭官至工部尚書謚文正從祀孔廟有湯子遺書。

吳郡山水之佳爲東南最而堯峯名特著者則以汪

鈍翁先生結廬故也鈍翁文章行誼高天下嘗辭官

讀書其中四方賢士大夫過吳者莫不願得其一言

以自壯而鈍翁常杜門謝客有不得識其面者則徘徊

澗石松桂之間望煙雲杳靄悵然不能去也以此

鈍翁名益重然亦有病其過峻者矣王子咸中舊家

吳市有亭臺池館之勝一日攜家卜隣構數椽於堯

峯之麓曰石塢山房日與鈍翁掃落葉烹苦茗嘯歌

晏息乎塢中鈍翁亦樂其恬曠數賦詩以贈之稱相
得也鈍翁應召入都咸中復從之舍舟登陸千里

黃塵追隨不少倦。蓋其有得于鈍翁者深矣。余嘗過吳門晤鈍翁于城西草堂。讀其所爲堯峯山莊諸詩。慨然欲往游。不果。至京師。始與咸中相見。叩其所學。大約以鈍翁爲宗。閒出其山房圖請記。余旣心儀其爲人。而又自悔不獲身至堯峯。以觀其所謂文石乳泉者。猶喜得于圖中想見其藤門蘿徑。芒鞋竹杖。相遇從吟咏時也。乃撫卷太息者久之。昔王摩詰輞川別業。山水據終南之勝。時有裴迪以詩文相屬和。至今覽其圖畫。所謂斤竹嶺。華子岡。彷彿猶想見其處。摩詰在開元天寶間。立身不無可議。徒以文詞之工。猶爲後人所豔慕如此。鈍翁品行之高潔。學術之正大。有非摩詰所敢望者。咸中志趣卓然。其所進未可量。或亦非僅僅裴迪比。其見慕于後人。更當何如也。故爲之記。

朱竹垞杭州洞霄宮提舉題名記

宮觀之設。其初本崇奉道士之教。玉清昭應宮使趙安仁王日丁謂領之。景靈宮使寇準馮拯領之。會靈觀使王欽若李迪領之。真宗嘗以命王曾。曾辭不居。仍以讓欽若。得毋恥以宰臣主道院事與仁宗手詔有云老臣朕之所眷禮也。故于引年辭疾者從其請。增其秩給其奉。加恩及其子孫。遇大禮許綴舊班失儀勿劾。宋之敬大臣體羣臣可謂至矣。舊制在京曰內祠。以前宰執留京師。及見任使相充使次充提舉下此提點主管判官都監各有分職。元豐再定官制緣祖宗所設不廢。居是位者食有奉衣有綾緝羅絲僕有餐錢。相循爲佚老優賢之典焉。杭州洞霄宮自熙寧初設有提舉。高宗南渡特改內祠。崇其體貌。以提舉受祠祿。歲有其人。稽之國史合之野紀。其先後

倫序爵里姓名猶可得而考也康熙癸酉九月予尋大滌洞天閱鄧牧心所撰志建炎以後主是祠者前言往行均未之載并爵里姓名十之堂中止設昭武李公新安朱子二主因語道紀司遺獻不宜湮沒許爲補錄書之壁歲華荏苒一十四年乃始具錄寄之自建炎迄咸淳凡一百一十五人嗚呼漢之丞相遇日蝕星變輒行策免或以微罪下獄致自殺其得安車駟馬賜金歸里者幾人哉南宋諸公獲退保祠祿不可謂非厚幸然迹其避賢者路未必皆安于義命有再出而僨師辱國者百世而下公非公是之心人皆有之安能箝天下之口而淆亂其功罪易之傳曰窮大者必失其居升而不已必困君子所貴乎知進退存亡而不失其正也若夫趙巘胡交修李正民以徽猷閣待制季陵以右文殿修撰衛膚敏沈晦以集

英殿修撰法原以顯謨閣待制紀傳概書曰提舉竊
疑所充乃提點主管之職與提舉蓋有別矣至于文
公當日第主管崇道沖祐雲臺崇福太乙諸祠提舉
鴻慶一宮未嘗主此地事從其實故不書康熙四十
六年秋七月前翰林院檢討充 日講官知 起居
注入直 南書房纂修明史一統志秀水朱彝尊記
朱竹垞尚書杜公疆理記

皇帝受寶命一十九年海波不揚金門廈門以次列
戍於時總督福建軍務都御史臣啓聖上言今投誠
之衆率前遷徙界外之民勒歸農則無田可給勢將
復去爲盜莫若以界外田地按籍給還并弛海禁收
魚鹽之利給軍食疏下廷臣議僉持不可二十二年
夏靖海將軍臣琅克彭湖島秋臺灣平捷書至 皇
帝嘉悅解衣賜琅并製詩褒美焉誕諭吉日告祀

孝陵冬十月戊寅

皇帝若曰海壩之弗靖權畫地

以民遷民之蕩析朕蠱傷于心久矣茲海濱永清界
外田畝宜給還耕墾咨汝工部侍郎世鑑副都御史
呀思哈偕往江浙吏部侍郎臻內閣學士石柱偕往
閩粵欽哉其善體朕意定軍之制圖民之艱於是杜
公拜命出是月己丑發京師明年正月踰大庾嶺
皇帝申命進公工部尚書公乃諭日展界自欽州之
防城始遵海以東歷府七州三縣二十九衛六所一
十七巡檢司一十六臺城堡砦二十一給還民地二
萬八千一百九十二頃復業丁口三萬一千三百定
縣軍之營二十八而廣東之疆理復矣自福寧州西
分水關始遵海以東歷府四州一縣二十四衛四所
五巡檢司三關城鎮砦五十五給還民地二萬一千
一十八頃復業丁口四萬八百定縣軍之營三十三

而福建之疆理復矣是役也公往還嶺海舟車之跋涉不啻三萬里蠻煙瘴雨毒霧之交侵蛇蛟之屢舞公與僕僕六七臥起油幕虎觸其藩不憚鬼嘯于林不驚僉謂公之大勇貴觀莫及行則射麋以爲糧縴蕉以被體安于惡衣食而不求溫飽忘一身之辛勤勞來安集俾氓反其宅商趁其墟苗秀于田水歸于壑牛宮豕圈鷄栖鴨闌各得其所甫終歲告成于闕下公雖不自言功而功已蓋於南國矣當周盛時召康公以重臣克親民事詩人懷之曰昔先王受命有如召公日辟國百里其後穆公繼之詩人又詠之曰式辟四方徹我疆土于疆于理至于南海夫以二公奏績于先後者公以一人兼之宜爲至尊注意而六卿掌其四也公旣歸田考終特未邀易名之典葬尊公之里人也慮公巡視本末未上諸國史因追

憶聞于公者麤舉大綱作記焉

朱竹垞萬柳堂記

度隙地廣三十畝爲園京城東南隅聚土以爲山不必帖以石也。捐溝以爲池不必甃以甃也。短垣以繚之騎者可望即其中境轉而益深園無雜樹迤邐上皆柳故其堂曰萬柳之堂今文華殿大學士益都馮公取元野雲廉公讌游舊地以名之也古大臣秉國政往往治園囿於都下蓋身任天下之重則慮無不周慮周則勞勞則宜有以佚之緩其心葆其力以應事機之無窮非僅資游覽燕嬉之適而已方元之初廉公定隴蜀還進拜中書平章政事賜宅一區暇同盧趙諸君子出郊置酒所謂萬柳堂者故老相傳在今豐臺左右當其飲酣賦詩命歌者進驟雨新荷之曲風流儒雅百世之下猶想見之今公弼諧盛際

謀謨內贊坐致太平其勳業與廉公等然廉公官撫
隴蜀荆南威望著于方隅而公澤洽天下廉公在廷
日少公自翰苑登政府立朝且三十年廉公畏譏憂
讒而公一德孚于上下所遇之隆有過于昔賢者要
之勤學好士孜孜恆若不及則異代同揆宜其曠世
有契于心也彝尊客山東時道經臨朐觀乎熏冶之
源清泉白沙淪漣側坎之下叢竹百萬詢之則公別
業循階以登徑之翳者當辟石之戴土者當剔亭之
圮者當葺公輶不治顧專力于是則以治源公所獨
樂而京師與天下人同其樂也入其門門者勿禁升
其堂堂焉者勿問庶幾物我俱忘者與堂成後適四
方人士應召至京師公傾心下交貧者爲致館病饋
以藥喪者賙以金一時抒情述德咸歌詩頌公難老
又慮公舍斯堂而請歸里也爭賦咏公前期公樂之

而不去彝尊椎鄙無文獨未獲游公之門其爲斯堂記者譬猶山禽楚雀啁啾翠陰之交公之聽之未必不欣然悅于耳焉

姜湛園十二硯齋記

余至京師交汪舍人蛟門聞有所謂十二硯齋者輒欲一至其處舍人曰無有也硯者吾夢也而齋者吾所假於大司馬梁公之館以挈吾妻子與奴婢所朝夕而處者也自吾之來京師攜一硯粗理而不受墨其旁緣缺然吾挾貲以僦人之居則朝至而夕徙然而硯者吾之所癖好也嘗夢得之其數十二故以名吾齋聊以寄吾生平之趣而已余曰善哉子之所託也今夫沄沄而生者其所需於物者寧有涯耶膏澤取於天貨財取於地日用玩好耳目之養取於山川雲物鳥獸蟲魚草木之繁夥若是者何一非假之於

物者哉。及其事去時移。則向之所需。泯然無一存焉。已夫。且與物而俱化。而愚者妄信之。以爲實然。且執之以爲己有。庸詎非大惑歟。夫日中而行。索夢於途之人。指逆旅而號之曰。吾廬也。則人必溺然疑之。而不知吾生之孰非夢。而吾所居之孰非逆旅也。不亦悲夫。若知凡物之本非吾有。吾皆得資之以爲吾用。此其爲樂。豈不大哉。其處也。仰而探於山。俯而汲於泉。煙雲足以資吾之懷抱。琴書足以供吾之嘯傲。其達也。宮室帷帳以爲安。黼黻旗旛以爲飾。鐘鼓筦絃八音之備。以爲樂。肥甘以爲吾之飲食。而輿臺以爲吾之使令。彼其初。皆非有與於我也。而吾皆得而有之。其得之以爲固然。取之不知其爲誰予。終身享之而不可以厭。是尚不知吾身之爲吾有也。而況凡物之自外至者乎。故曰。身者。天地之委形也。知身爲吾。

之所本無與物之原未嘗爲吾有以無有遇無有則
氾然而若辭充然而不居若是者以語于道則幾矣
然則舍人疇昔之夜殆非夢也子之硯固在而子之
齋固不待假而有也予以舍人爲知道得莊生齊
物之趣

胡稚威蒲州府復涑姚二渠記

蒲晉之坤河帶如玦川在州域北汾南涑涑自唐都
督薛萬徹導水夏縣至臨晉西委張澤入於河解之
平陸泉出橫嶺澗合溪赴會流以盛隋都水姚暹渠
引焉至蒲虞鄉縣澤首受亦西入于河然暹所引本
北魏永豐舊渠而酈善長謂涑水西逕郇瑕又西南
逕張揚城屬於陂則非萬徹暹所始營唯二渠源潰
山谷悍挾泥沙時時滯不循其理久益爲變暹徹所
以條其攸歸必使之復去害致利以予其民宜著史
書稱名勿絕至今渠自兩人後開塞幾變近廢不治

痛甚而張澤者卽善長書涑所屬陂今以爲湖變其名五姓湖故灌渠郵以輸河涸三數十載鯀前時入河道凡二渠積閼流當就湖者或不能至若夏秋會甚風淮雨噓漲鼓怒涑衝暹渠力併壯決敗解鹽池蕩廬稼駿撼郭邑因飈注湖莫有洩容游波踔騰四齧原陸蒲解之人用爲困河東兵備道喬公蒞蒲三年政理孔成邦俗大和前寧武太守周侯用循賢移知蒲府事相與謀吾民幸保生聚樂安業今數縣氓庶釋咨畢恬猶若未者且解池繫國賦鉅唯水是病卻蓄底輯使無濫沈川瀆順性歲種時慶經務之要莫急且先乃召父老告以渠河興罷孰利咸曰苟導復之利世世於是計涑與暹渠左右夫家其田溉潤得及者率戶役焉其非蒲所治而統於河東爲解州以界其守其在蒲縣四曰猗氏臨晉虞鄉永濟周侯

董其令分主之以爲禹治水施先下流湖渠同時乃
畚乃鏀乃疏乃穿乾隆甲戌春正月水功是興遠四
月成自解安邑屬蒲永濟三百餘里循渠樹防翼翼
桀桀式砥式遏而邸家營者介虞鄉猗氏勢尤南庫
異時涑橫擣入里爲巨浸狂溜勇淘地益底深岸高
下絕懸五六丈崩口不可塞合周侯謂此涑要害如
軍陳攻守必爭險勝出俸錢買其傍田盡土寶之奪
其凶門卒杜服上爲其隄崇築加仞厚固彌輦責官
吏以時衛於是憤帖鬱言潦縮其暴平野者壞出其
淪於墊者昔若食得餧茲委墊如紡土燥厥穉復於
田耕塗懼里歌忘其恐難方役之興公及周侯躬巡
渠所勞其人勿怠日夕既訖徧酒肉賚賜慰遣焉今
夫去疾病而復於壯者之爲復國地失而復克取有
之之謂復城郭道路陂澤隄渠其旣廢而治興焉之

謂復修其圮。攘其患。用其利。猶起膏肓。奮武烈。均乎大庸。予診斯謀。美河東公功。太守侯之勞烈。同德協慮。康享斯民。視逞萬徹所爲。尤有尚思揚其光。嘉昭無休。且告繼爲政者。斯循之。亦克保奠以終。永厥緒母隱。

姚姬傳儀鄭堂記

六藝自周時儒者有說。孔子作易傳。左丘明傳春秋。子夏傳禮喪服。禮後有記。儒者頗衰。取其文。其後禮或士而記存。又雜以諸子所著書。是爲禮記。詩書皆口說。然爾雅亦其傳之流也。當孔子時。弟子善言德行者。固無幾。而明於文章制度者。其徒猶多。及遭秦焚書。漢始收輯文章制度。舉疑莫能明。然而儒者說之。不可以已也。漢儒家別派分。各爲專門。及末造。鄭君康成總集其全。綜貫繩合。負閔洽之才。通羣經之。

滯義雖時有拘牽附會然大體精密出漢經師之上
又多存舊說不掩前長不覆己短觀鄭君之辭以推
其志豈非君子之徒篤於慕聖有孔氏之遺風者與
鄭君起青州弟子傳其學既大著迄魏王肅駁難鄭
義欲爭其名僞作古書曲傳私說學者由是習爲輕
薄流至南北朝世亂而學益壞自鄭王異術而風俗
人心之厚薄以分嗟夫世之說經者不斲明聖學詔
天下而顧欲爲己名其必王肅之徒者與曲阜孔君
撝約博學工爲詞章天下方誦以爲善撝約顧不自
足作堂於其居名之曰儀鄭自庶幾於康成遺書告
余爲之記撝約之志可謂善矣昔者聖門顏閔無書
有書傳者或無名蓋古學者爲己而已以撝約之才
志學不忘又智足知古人之善不將去其華而取其
實擴其道而涵其藝究其業而遺其名豈特詞章無